

## 50 + - und Du bisch duss...?!?

**50 plus** – das isch jetzt grooss in Moode,  
doch mänggmool fliegsch hart uff Boode;  
amme kunnt's zeme Brueder-Kuss,  
s'näggscht Mool blybt dr nur Verdruss.  
Die Ainte dien dy gärn aahimmle,  
und warte, bis duesch afoo schimmle!  
Anderi erheebe s'Glaas fir Di,  
und maine scho, das syg's denn gsi!

**Aber halt – mir sinn im Fluss  
und no schampaar guet im Schuss!**

Me nimmt zem wärbe – **50 plus**  
als dr nejscht Regglaame-Schuss.  
Was me mit some Slogan mecht?  
S'isch glaar – die alte Kerze-Decht,  
wo s'Lääbe lang hänn derfe grampfe,  
und in de Buuden ummestampfe,  
zem's speeter e glai besser z'haa,  
deene wott me zimpftig draa!

**Doch mir alli – 50 plus  
mir sinn denn no lang nit duss!**

Mit **50 plus** gilt me suschpäggt,  
als wär me bletzig nimm perfäggt!  
Das isch doch komplette Stuss;  
mir sinn no allewyyl im Schuss;  
e Gleesli Wyy im dichte Dungle,  
do gsehsch unseri Gsichter funggle!  
Scho kemme drab die Lytt zem Schluss;  
die fahre glyy mitem Friedhof-Bus!

**So goht das nit, egal wie plus,  
mir sinn no lang e harti Nuss!**

Mir wotte drum nit druurig syy,  
au **60 plus** luegt schuurig dryy!  
Voll Ironie – und mit Verdruss  
maint men au no d'**70 plus**!  
Zem Byschpiil d'Queen, dä änglisch Gloon  
hoggt scho **50** Joor uffem Throon.  
Eso gseh – wemes wurd verglyyche,  
wär dr Morin schonen alti Lyyche!

**So gheere mir mit 50 plus  
No ewig nit zem Iberfluss!**

D'Bangg-Mänätscher. wo oobe hogge,  
und unser Gäld ins „Nichts“ verzogge,  
reede nur vo kirzen und strähle;  
me bruucht uns numme no zem wähle!  
Ains isch jo glaar – zem Lääbes-Räschte  
gheeren au unseri Alters-Bräschte!  
Me froggt sich nur – ibere Duume pailt;  
wird uns bald au no d'Ränte dailt?

**Liebi Bonze, das wär ächte Stuss,  
und e harti Nuss fir die 50 plus!**

Klaar isch – me mecht uns gärn an Kaare  
und losst is zinsloos Bätze Spaare!  
Nonem Motto: mälich die Kueh,  
d’**“Golden Agers“** hänn jo Alli gnue,  
dien is d’Bangge nyt me schängge  
und lehn d’ **50-plus** lo hängge!  
Maint aigentlig das Lumpepagg,  
du sygsch bereits en alte Sagg?

**Au wenn ihr mainet, es syg Schluss,  
mir lääbe no in heegschtem Gnuss!**

Rot/Grien e Muss?	E harti Nuss!
D’Wirtschaft im Fluss?	Fertige Stuss!
Bundesroot duss?	Ai Verdruss!
Queen Lisbethli Schluss?	No lang im Schuss!
SVP hindenus?	E Supergnuss!
Putin e Russ?	Fähl-Erguss!
Dr Wäber nit duss?	Friedhof-Bus!
<b>D’QS 50 plus?</b>	<b>Bis hundert im Schuss!</b>

Mir waggel stargg in schweere Bahne  
und heebe d’fuffzger-heeri Fahne!  
So kasch nimm lang in d’Irri rytte,  
es kemme wirgglig wirri Zytte!  
Noo **50 plus** wird’s als wie schytter,  
und bald weisch nimmi, wie goht’s wytter!  
Ebb Dy - me hätt’s jo lieber au scho gwüsst,  
nach 50 nomool d’Muuse küsst?

**Au wenn mir mien dur Grääbe glaite,  
mir dien sälber unser Lääbe laite!**

Drum laufemer hitte scheen im Gold  
und blyybe dr Frau Fasnacht hold.  
Allen Andere duesch ains zwagge,  
die gsehn nur unseri Fuudibagge,  
und die, wo gärn bruun ummeschlägge,  
die kennen uns am Fuudi lägge!  
Und wie dr Mörgeli lutt heersch lalle,  
lehn au mir uns nyt me gfalle!

**Ebb 50, 60 oder plus,  
mir fiehlen uns im Fasnachtsfluss!**

Au wenn do Ainigi dien grinse -  
me holt vom „Konto ohni Zinse“  
e glaine Batze fir e Bier,  
s’längt au fir 2, 3 oder vier.  
Do sait me denn; lueg, sälle Huffe  
ka no allewyyl vom Hälle suffice,  
und vo däm, wo unseri Bangge gschtalte,  
schmeggsch numme no e Gschtangg, e ballte!

**50 plus – und Du bisch duss?  
Naj, dasch immer no kai Schluss!**

Das Süschée het uns gwaltig graizt  
und unseri Zunge spaltig gspraizt!  
Im Santi Hans heersch d'Mätzli ruesse,  
e Schuggerkätzli steggt dert Buesse,  
und mir mien mit unsere Bräschte ringe,  
s'isch zem vo de Käschte springe!  
Doch mir blyybe grad im Schueh,  
denn mir hänn jetzt langsam gnue!

**Dängget draa – mir 50 plus  
sinn wie gsait no lang nit duss!**

So mache halt mir **50 plus**  
drei Dääg Fasnacht in aim Guss,  
erlääbe d'Route im Erguss,  
bykemme so dr Muuse-Kuss,  
sinn bis am Donnschtig digg im Schuss  
und verspyre heegschte Gnuss.  
So kunnt das Süschée denn zem Schluss;  
D' QS sinn no lang nit duss!

**Die andere fahre bis zem Schluss  
denn sälber mitem Friedhof-Bus!**